



Inatsisartuni ilaasortaq Karl Lyberth
-/Maani

**§ 37 naapertorlugu apeqqummut nr. 2011-32-imut mellembølgekkut aallakaatsit-
sissutinut tunngasumut akissuteqaat**

Asasara Karl Lyberth

Saaffiginnissutinut qujanaq. Apeqqutinut tunngatillugu imaattunik ilisimatitsissuteqar-
figisinnaavakkat.

**1. KNR-Radiop mellembølgekkut aallakaatitsisarnerata ingerlatiinnarnissaa
anguniarlugu mellembølgekkut aallakaatitsissutit nutarternissaat, ingerla-
tiinnarnissaat qanoq akeqarpa?**

2009-mi mellembølgekkut nassitsissutinik ingerlatsineq 3,1 mio. koruunit missaannik
akeqarpoq.

Kisiannili mellembølgekkut nassitsissutit maannakkut atorreqartut 1980-imeersuupput -
tassalu ukiut 30-it missarpiaannik pisoqaassuseqarlutik. Taamaattumik ukiuni tulliuuttuni
aserfallatsaaliuinissamut pisariaqartitsineq annertusiartortussaavoq, ingerlanneqaan-
nassappatalu 2009-mi aningaasat taaneqartut qaangerneqassasut naatsorsuutigineqar-
poq.

Tamatuma saniatigut atortunut maannakkut atorreqartunut kingoraartissanik tunisas-
siortoqarunnaarsimavoq. Taamaattumik KNR Radio mellembølgekkut aallakaatinnegar-
taannassappat, nassitsissutinik nutaanik pisinissamut aningaasaliissutissat amerlasoor-
sui atorfissaqartinneqartussaapput.

Mellembølgekkut nassitsissutit aallaqqaammut sananeqarput KNR radio nunaqarfinni
tusaaneqarsinnaaniassammat; ullumikkut tamanna FM-ikkut nassitsissutit atorlugit pi-
sarpoq. Tassalu ukiuni arlalinni KNR Radiup aallakaatitaanik siaruarterinermi nassitsis-
sutit marluk ataatsikkut atorreqarsimapput. Mellembølgekkut nassitsissutit FM-ikkut
nassitsissutit atorlugit KNR Radiup aallakaatitaanik tusarnaarsinnaanngitsunut sullissis-
sutit atorreqarmata, nassitsissutit marluk taakku maannamut atuutsiinneqarsimap-
put. Kisiannili mellembølgekkut nassitsissutit siunertarineqartorpiamut atoneerussi-
mammata, ingerlatsiinnarnissaq siunertarlugu sanaartugassanut aningaasaliinissamut
tunngavissaqartoqassasoq Naalakkersuisut isumaqanngillat.

11. feb 2011
Sagsnr. 2011-045195
Dok. Nr. 562712

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

2. Mellembølge atorunnaarsinneqassappat KNR-Radiomik tusarnaarsinnaajunnaartut tusarnaqqissinnaalernissaat anguniarlugu Naalackersuisut qanoq sunillu suliniuteqartoqarpa?

Aallarniutigalugu erseqqissaatigerusuppara, mellembølgekkut nassitsissutinik matusineq imarsionermi ajunaalersunik isumannaallisaanikkullu sullissinermut sunniuteqassanngimmat, tassani atortut assigiinngitsut marluk pineqarmata. Tassalu sinerissami radioqarfiit mellembølgekkut sullissinerat kalluarneqassanngilaq, aammalu sinerissami radioqarfiit sulii, soorlu ilaqtutani toqusoqartillugu imaani umiarsuarnut attaveqaqateqarnermut atorneqarsinnaapput.

Naalackersuisuniilli ilisimaneqarpoq inuppassuit, ilaatigut piniartut aalisartullu silassaq KNR Radiukkut tusarnaarlutaaraat. Sullissinermut tassunga periarfissaqarnerup ingerlaannarissaa qulakkeerniarlugu 2010-mili juunip naanerani silassaq sinerissami radioqarfinniit VHF-ikkut kanalit sullississutit aqutitigalugit ullormut sisamariarlutik aallakaatinneqartalerpoq: 08.05, 12.05, 18.05 kiisalu 22.05. 12.05 aamma 22.05 aallakaatit aallakaateqqitaapput. Tamatuma saniatigut Danmarks Meteorologisk Institut-imit anorersuarnissaanut, anorsarinnaanut sermernaarissaanullu aarlerisaarutit ullormut sisamariarlutik sinerissami radioqarfimmiit VHF-ikkut kanalit sullississutit aqutitigalugit aallakaatinneqartarput: nal. 06.05, 11.05 aamma 21.05. Aarlerisaarutit tuluttut, kalaallisut tuluttullu aallakaatinneqartarput. Tassanngaannaq silarluleriataartillugu aarlerisaarutit Danmarks Meteorologiske Institutimit figuneqarneranni erngerlutik aallakaatinneqartarput.

Taamaattumik ukioq kaajallallugu pinngortitami angalanermi silassamut sulii malinnaarissaaq ajornartussaangilaq.

Kalaallit Nunaata kujataani savaatillit eqqorneqartussat eqqarsaatigalugit TELE Greenland aqqiissutissamik, savaatillit 2011-p ingerlanerani VSAT-imut tigooqqaassutit aqutitigalugit KNR Radiukkut aallakaatitanik tusarnaarsinnaalernissaannik – aamma digital tv-kkut isiginnaarsinnaalernissaannik – qulakkeerisussamik suliaqarpoq.

Ineqarnermut, Attaveqarnermut Angallanermullu Naalackersuisoqarfiup allakkatigut aammalu savaatilinnut siunnersuisoqarfik aqutitigalugu mellembølgekkut nassitsissutit matuneqarnissaat savaatilinnut qanoq sunniuteqassanersut pillugu savaatillit ilisimatit-sissuteqarfikai. TELE Greenlandip, suliap ingerlaqqinnissaanik isumaginnittuusussap savaatillit ingerlaavartumik attaveqarfigisarnissaat isumagissavaa.


Kisiannili inunnik FM-ikkut nassitsissutit inugaanniitillutik KNR Radiup aallakaatitaanik tusarnaarsinnaajunnaartunik peqartussaavoq. Tamanna soorunami Naalackersuisuniit ajuusaarnartuuttipparput, kisiannili matusinissaaq isumannaallisaanikkut sunniuteqartussaangimmat suliniutinik allanik aallartitsinissaaq siunertarineqanngilaq.

Tamatuma saniatigut ingerlatsinermut ukiumut sipaarutissat, mellembølgekkut nassitsissutit matuneqarnerisigut anguneqartussat nassitsissutit digitaliusut, 2010-miit 2012-imut nassitsissutit analogiusut taarsersorneqarnerini taartaasussat ingerlanneqarnerinut atatillugu aningaasartuutaanerusussanut aningaasalersuinermit atorneqassapput. Mellembølgekkut nassitsissutit matuneqaraluartut, nassitsissutit digitaliusut assitaliussat pitsanerulernerinik aammalu kanalit amerlanerusut aallakaatinneqarsinnaalernerinik ki-

nguneqartussaammata, Naalakkersuisut isumaat malillugu aallakaatitsissutit ataatsimut isigalugit pitsaanerulernerat innuttaasunit amerlanernit misigineqartussaavoq.

Naggasiutigalugu erseqqissaatigissavara, KNR-ip ullumikkut nutaarsiassat internettimut ivertittalereermagit, taamaattumillu kingusinaalaaraluartumik tusarnaarneqarsinnaallutik. Tamatuma saniatigut KNR-ip 2011-p ingerlanerani KNR Radiup internettikkuq toqqaanartumik aallakaatinneqartalerinissaa naatsorsuutigaa. Taamaalilluni innuttaasut internettimik atuinissamik periarfissaqartut FM-ikkut nassitsissutit atunngikkaluarlugit KNR Radiup aallakaatitaanik qaammataasatigut tusarnaarsinnaalissapput.

Inussiarnersumik inuulluaqqusillunga



Jens B. Frederiksen